

Dagsetning 4. desember 2012

Atvinnuveganefnd Alþingis
Austurstræti 8-10
150 Reykjavík

Atvinnuveganefnd Alþingis hefur óskað eftir umsögn Byggðastofnunar um tillögu til þingsályktunar um jöfnun húshitunarkostnaðar og flutningskostnaðar á raforku á landsvísu, mál 81.

Hlutverk Byggðastofnunar er að vinna að eflingu byggðar og atvinnulífs á landsbyggðinni og miðast eftirfarandi umsögn við áhrif frumvarpsins á þá þætti.

Ekki hefur verið fjallað um umsögnina í stjórn stofnunarinnar.

Byggðastofnun telur réttlætismál að húshitunarkostnaður og flutningskostnaður verði jafnaður og styður að ráðherra verði falið þetta verkefni.

Virðingarfyllst

Guðmundur Guðmundsson
Sérfræðingur á þróunarsviði
Byggðastofnunar.

Alþingi
Erindi nr. Þ 141/663
komudagur 21. 11. 2012

Akureyri 19. nóvember 2012


Atvinnuvega- og nýsköpunarráðherra
Steingrímur J. Sigfússon
Skúlagötu 4
150 Reykjavík

Á aðalfundi Eypings 2012 var samþykkt ályktun um **úrbætur á flutningsgetu á raforku**, sem fylgir hér á eftir.

Aðalfundur Eypings, haldinn á Dalvík 5. og 6. október 2012, lýsir yfir áhyggjum af því að takmörkuð flutningsgeta á rafmagni innan svæðisins geti haft þau áhrif að skekkja samkeppnisstöðu fyrirtækja á starfssvæði Eypings. Flutningsgeta má ekki standa eðlilegri atvinnuþróun og atvinnuuppbyggingu fyrir þrifum. Samhliða þessu þarf að huga að öryggi í afhendingu á rafmagni en fyrirtæki á Norðurlandi hafa upplifað rafmagnsleysi í tvígang á árinu sem hefur haft veruleg áhrif á rekstur fyrirtækjanna.

Þá leggur fundurinn þunga áherslu á að þriggja fasa rafmagn verði í boði á öllu svæðinu.

Virðingarfyllst,



Pétur Þór Jónasson
framkvæmdastjóri

Afrit:
Atvinnuveganefnd Alþingis

Nefndasvið Alþingis
Austurstræti 8 – 10
150 REYKJAVÍK

Alþingi
Erindi nr. P 141/1368
komudagur 6.2.2013

Reykjavík, 06.02.2013
Tilvísun vor: 00.11

Efni: Umsögn um tillögu til þingsályktunar um jöfnun húshitunarkostnaðar og flutningskostnaðar á raforku á landsvísu, 81. mál.


Að beiðni nefndasviðs Alþingis hefur Landsvirkjun fjallað um tillögu til þingsályktunar um jöfnun húshitunarkostnaðar og flutningskostnaðar á raforku á landsvísu sem lagt hefur verið fyrir á 141. löggjafarþingi 2012 – 2013.

Landsvirkjun telur ekki skynsamlegt að jafna húshitunarkostnað eða raforkukostnað á landsvísu eins og lagt er til. Niðurgreiðslur og millifærslur skekkja verðvitund neytenda og leiða til óskynsamlegrar nýtingar orkuauðlinda. Með því væri dregið verulega úr hvata til að spara orku og þörf fyrir aukna orkuöflun aukin.

Landsvirkjun telur að ef Alþingi ákveður að jafna orkukostnað með þeim hætti sem tillagan gerir ráð fyrir beri að fara með það sem hverja aðra félagslega aðgerð sem ríkið aflar tekna til með almennum sköttum og jafnframt óskynsamlegt að taka upp sérstakt jöfnunargjald á raforku eins og lagt er til. Auk þess sem fram kemur í 1. mgr. er ástæða til að vekja athygli á því að álagning og innheimta gjalds sem þessa væri flókin í framkvæmd og reynslan sýnir að þrýstingur mun skapast hjá litlum orkufyrirtækjum til að losna undan slíku gjaldi og sama mun eiga við hjá notendum sem búa við alþjóðlega samkeppni.

Loks skal minnt á að um árabíl var lagt verðgjöfnunargjald á raforkusölu. Það gjald var fellt úr gildi þann 1. mars 1986 í tengslum við kjarasamninga vegna mikillar gagnrýni á kerfið og neikvæðra afleiðinga sem það hafi. Forsendur til gjaldtöku eru að mati Landsvirkjunar minni í dag en þær voru fyrir aldarfjórðungi þegar ákveðið var að hætta henni.

Virðingarfyllst



Hörður Arnarson
forstjóri

Nefndasvið Alþingis
b.t. Atvinnuveganefndar
Austurstræti 8-10
150 Reykjavík

TPH/lS

3. desember 2012

Varðar: Tillögu til þingsályktunar um jöfnun húshitunarkostnaðar og flutningskostnaðar raforku á landsvísu, 81. mál.

Skv. tillögunni er gert ráð fyrir að fela atvinnuvega- og nýsköpunarráðherra að undirbúa endurskoðun löggjafar á sviði raforku- og hitaveitumála með því að lagt verði sérstakt jöfnunargjald sem notað verði til niðurgreiðslu húshitunarkostnaðar og flutningskostnaðar raforku, með það að markmiði að jafna húshitunarkostnað og raforkukostnað á landsvísu svo að notendur greiði sama verð fyrir þjónustuna óháð búsetu.


RARIK styður tillögu um verðjöfnun á raforku og hefur ítrekað bent á nauðsyn þess að jafna verð, ekki síst milli dreifbýlis og þéttbýlis, en einnig að jafna orkuverð til húshitunar, ekki síst á svokölluðum köldum svæðum.

RARIK bendir á að núverandi löggjöf á sviði raforku- og hitaveitumála gerir ráð fyrir að verðjafna megi að fullu milli dreifbýlis og þéttbýlis, þótt ekki hafi verið pólitískur vilji til að nýta þær heimildir með framlögum á fjárlögum fram að þessu. Þvert á móti hefur dregið úr framlagi til þessa málaflokks, hvort sem er á föstu verðlagi, eða í framlagi á hverja kílóvattstund. Þannig var veitt 230 milljónum til þessarar verðjöfnunar á árinu 2005, en á árinu 2012 var veitt 240 milljónum í þennan málaflokk og skv. núverandi fjárlagafrumvarpi fyrir 2013 sömu upphæð.

Framlag til niðurgreiðslna á húshitun hefur lítið hækkað að krónutölu á fjárlögum á undanförunum árum og hefur því dregist saman að raungildi. Íbúar á köldum svæðum þurfa að greiða umtalsvert hærra verð til húshitunar en flestir þeir sem búa á hitaveitusvæðum. Mikilvægt er að mati RARIK að þetta sé jafnað og styður RARIK tillögu þess efnis. Hins vegar er rétt að benda á að orkuverð hitaveitna er mjög mismunandi og verð hjá nýjum hitaveitum sem reistar hafa verið á undanförunum árum er tiltölulega hátt. Ekki verður séð að unnt sé að niðurgreiða rafhitun meira en sem nemur því verði sem í gildi er hjá þeim hitaveitum sem búa við hæst verð, nema niðurgreiða verð til viðskiptavina þeirra einnig.

Tillagan gerir ráð fyrir að undirbúa eigi endurskoðun á löggjöfinni með því að leggja á jöfnunargjald á orku. Í því samhengi er rétt að minna á að rafhituð heimili í dreifbýli nota u.þ.b. 10 falda notkun á við heimili á hitaveitusvæðum í þéttbýli og með skattlagningu á rafmagn væri mestur skattur tekinn af þeim sem helst þarf að jafna til.

Virðingarfyllt,


Tryggvi P. Haraldsson, forstjóri RARIK



Innan Samorku starfa fráveitur, hitaveitur, vatnsveitur, raforkuframleiðendur og flutnings- og dreifingaraðilar raforku

Alþingi
Erindi nr. Þ 141/844
komudagur 3.12.2012

Nefndasvið Alþingis
b.t. atvinnuveganefndar
Austurstræti 8-10
150 Reykjavík

3. desember 2012

Umsögn um till. til þingsál. um jöfnun húshitunarkostnaðar og flutningskostnaðar á raforku á landsvísu, 81. mál

Tillagan hljóðar þannig:

Alþingi ályktar að fela atvinnuvega- og nýsköpunarráðherra að undirbúa endurskoðun löggjafar á sviði raforku- og hitaveitumála með því að lagt verði á sérstakt jöfnunargjald sem notað verði til niðurgreiðslu húshitunarkostnaðar og flutningskostnaðar á raforku, með það að leiðarljósi að jafna húshitunarkostnað og raforkukostnað á landsvísu svo að notendur greiði sama verð fyrir þjónustuna óháð búsetu.

Samorka vekur athygli á því að með fullri niðurgreiðslu á flutnings- og dreifingarkostnaði yrði í mörgum tilvikum fjarlægður helsti hvatinn til að nýta hagkvæmstu auðlindina. Þannig myndi slíkt kerfi vinna gegn hvoru tveggja hagræðingu og sjálfbærni. Forsendur jarðhitaleitar og stofnunar nýrra hitaveitna myndu rýrna mjög verulega þar sem dregið yrði mjög verulega úr öllum hvata til þess að leggjast út í fjárfestingar í nýjum hitaveitum.

Félagslegar aðgerðir sem greiðist af almennu skattfé

Hvað varðar tillögu um jöfnunargjald þá er þarna verið að leggja til að félagslegar aðgerðir, sem í dag eru fjármagnaðar beint af ríkissjóði (sem var eitt af grundvallaratriðum við setningu raforkulaganna árið 2004) og þar með af skattgreiðendum almennt, verði í framtíðinni fjármagnaðar af orkunotendum og þá í beinu hlutfalli við það orkumagn sem þeir nota í dag. Að mati Samorku er engan veginn ásættanlegt að flækja þannig framkvæmd og draga úr gegnsæi verðlagningar á dreifingu á orku með því að blanda þar inn félagslegum aðgerðum sem í dag eru fjármagnaðar af almennu skattfé. Samtökin minna á að á sínum tíma var horfið frá hinu mjög svo umdeilda verðjöfnunargjaldi á raforku, einmitt í ljósi þeirrar miklu gagnrýni sem það sætti vegna skorts á gegnsæi og sanngirni í dreifingu þess kostnaðar sem kerfið hafði í för með sér.

Samorka leggst gegn samþykkt tillögunnar.

Að öðru leyti vísast til umsagna einstakra aðildarfyrirtækja Samorku.

Virðingarfyllst,

Guðstaf Adolf Skúlason
aðstoðarframkvæmdastjóri